



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i 89/16) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2019. GODINU **PLATFORME ZA PROGRES**

Broj: 03-07-6-291/20
Sarajevo, 16.09.2021. godine

SADRŽAJ

MIŠLJENJE.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS REVIZIJE.....	4
Predmet revizije.....	4
Cilj revizije.....	5
Obim revizije.....	5
4. PRETHODNE KONTROLE I REVIZIJE.....	5
5. NALAZI I PREPORUKE REVIZIJE.....	5
5.1 NALAZI.....	5
5.2. PREPORUKE.....	13

MIŠLJENJE

Služba za reviziju finansiranja političkih stranaka izvršila je reviziju godišnjeg finansijskog izvještaja Platforme za progres za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom godišnjeg finansijskog izvještaja za 2019. godinu, utvrđeno je da je Platforma za progres prekršila odredbe člana 4. stav (1), člana 5. stav (4), člana 8. stav (1) i stav (4), člana 11. stav (1) i člana 12. stav (1) i člana (4) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Platforma za progres u 2019. godini postupala u skladu sa odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Platforme za progres za 2019. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2019. godinu, Platforma za progres se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	50.683,43	22,26
2.	Prilozi fizičkih lica (3-a)	163.974,07	72,03
3.	Prilozi pravnih lica (3-b)	13.007,16	5,71
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	0,00	0,00
8.	Prihodi od propagande (3-g)	0,00	0,00
I	Ukupni prihodi (1-8)	227.664,66	100,00
II	Ostali prihodi i drugo	3,73	0,00
	Izvori finansiranja (I+II)	227.668,39 ¹	100,00

U godišnjem finansijskom izvještaju stranka je iskazala rashode u ukupnom iznosu od 151.812,40 KM.

2. PREDSTAVLJANJE POLITIČKE STRANKE

Naziv političke stranke: Platforma za progres. Skraćeni naziv: Platforma.

Politička stranka Mirsad Hadžikadić-Platforma za progres registrovana je kod Općinskog suda u Sarajevu dana 20.04.2018. godine, Rješenjem broj: 065-0-F1-18-000005. Dana 15.11.2018. godine, Rješenjem Općinskog suda u Sarajevu broj: 065-0-F1-18-000012 upisana je promjena naziva političke stranke, koji glasi: Platforma za progres. Rješenjem broj: 065-0-F1-20-000005 od 30.04.2020. godine upisana je promjena sjedišta stranke.

Sjedište političke stranke je u Sarajevu, ulica Hiseta 1.

Lice ovlašteno za zastupanje stranke je Mirsad Hadžikadić, predsjednik.

Lice ovlašteno za finansijske izvještaje za 2019. godinu je Sanel Šarić.

Prema podacima iz godišnjeg finansijskog izvještaja za 2019. godinu, politička stranka ima sljedeću organizacionu strukturu:

- Centrala.

3. OPIS REVIZIJE

Predmet revizije je godišnji finansijski izvještaj Platforme za progres za 2019. godinu.

¹ Podaci iz korigovanog godišnjeg finansijskog izvještaja za 2019. godinu koji je dostavljen dana 13.10.2020. godine.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Platforma za progres u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskih izvještaja Platforme za progres obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Nakon obavljenog pregleda finansijskih izvještaja za 2018. godinu, izdat je Izvještaj o pregledu sa mišljenjem revizora, nalazima i preporukama stranci da uspostavi evidencije o priložima i izdaje potvrde o primljenim priložima čiji je sadržaj propisan odredbama člana 6. Pravilnika o godišnjim finansijskim izvještajima političkih stranaka, da se ne finansira iz izvora koji su zabranjeni političkim strankama, da poslovne knjige vodi u skladu sa računovodstvenim propisima, odnosno da uspostavi tačne evidencije o prihodima, rashodima i novčanim tokovima stranke i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Platforma za progres nije ispoštovala date preporuke.

5. NALAZI I PREPORUKE REVIZIJE

5.1 NALAZI

a) Platforma za progres prekršila je odredbe člana 4. stav (1) Zakona o finansiranju političkih stranaka².

Platforma za progres je sredstva stranke utrošila bez donesenog programa utroška sredstava za 2019. godinu, čime je prekršila odredbe člana 4. stav (1) Zakona o finansiranju političkih stranaka.

U godišnjem finansijskom izvještaju za 2019. godinu Platforma za progres iskazala je ukupne rashode u iznosu od 151.812,40 KM.

Uvidom u raspoloživu dokumentaciju utvrđeno je da stranka Program utroška sredstava za 2019. godinu nije dostavila uz godišnji finansijski izvještaj za 2018. godinu, a što je bila obavezna.

Stranka je Centralnoj izbornoj komisiji Bosne i Hercegovine, dana 23.10.2020. godine, u dodatnoj dokumentaciji za 2019. godinu dostavila i akt broj: 07,1-23/19 od 31.03.2019. godine u kojem je navela da dostavlja Plan utroška sredstava za 2019. godinu. Stranka, međutim, navedeni akt nije dostavila Centralnoj izbornoj komisiji Bosne i Hercegovine u 2019. godini, što je potvrđeno i tokom obavljanja revizije godišnjeg finansijskog izvještaja, te isti nije uzet u razmatranje.

b) Platforma za progres prekršila je odredbe člana 5. stav (4) Zakona o finansiranju političkih stranaka.

(1) Kontrolom podataka o uplatama putem PayPal računa, utvrđeno je da stranka u poslovnim knjigama nije evidentirala, a u godišnjem finansijskom izvještaju nije prijavila donacije uplaćene putem PayPal računa u decembru 2019. godine³, čime je prekršila odredbe člana 5. stav (4) Zakona o finansiranju političkih stranaka.

² U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

³ Detalji navedeni u nalazu e).

- (2) Stranka nije uspostavila pravilne evidencije za priloge fizičkih i pravnih lica koji su uplaćeni putem PayPal računa od januara do avgusta 2019. godine, a koje je suprotno odredbama člana 13, 14. i 15. Pravilnika o godišnjim finansijskim izvještajima političkih stranaka⁴ u godišnjem finansijskom izvještaju iskazala kao članarine.

Služba za reviziju je utvrdila da je stranka sredstva koja su prenesena sa PayPal računa iskazala isključivo na kontu članarine u ukupnom iznosu od 30.433,98 KM, iako je evidentno da su fizička lica uplaćivala sredstva u većim iznosima od iznosa propisane članarine. Takođe, u istom periodu putem PayPal računa stranci su uplaćivala donacije i pravna lica.

Uvidom u poslovne knjige i drugu dokumentaciju stranke, utvrđeno je da stranka nije obezbijedila dovoljne i adekvatne evidencije za navedene priloge, odnosno nema podatke o tome koliko je tačno svako fizičko i pravno lice uplatilo sredstava na račune stranke.

- (3) Stranka nije svim donatorima-fizičkim licima izdala potvrde u skladu sa odredbama iz člana 6. Pravilnika o godišnjim finansijskim izvještajima političkih stranaka, čime je prekršila odredbe člana 5. stav (4) Zakona o finansiranju političkih stranaka.

U toku obavljanja revizije godišnjeg finansijskog izvještaja utvrđeno je da je stranka umjesto potvrda o prijemu priloga, fizičkim licima izdavala i priznanice koje se ne mogu smatrati potvrdom i ne sadrže sve podatke propisane u članu 6. Pravilnika o godišnjim finansijskim izvještajima političkih stranaka.

c) Platforma za progres prekršila je odredbe člana 8. stav (1) Zakona o finansiranju političkih stranaka.

Platforma za progres je tokom 2019. godine putem PayPal računa primila uplate od pravnih lica iz inostranstva i uplate za koje nema dovoljno podataka o identitetu donatora, i to:

-Stranka je putem PayPal računa primila sredstva od sljedećih donatora: Aferim Solutions u iznosu od 163,59 KM, Creating new you u iznosu od 162,26 KM, Identity developers u iznosu od 19,56 KM, Amer Smajkic MD LTD u iznosu od 461,16 KM, Sponiart u iznosu od 85,40 KM, Zlatko Habibovic i associates u iznosu od 854,00 KM, Deal Depot u iznosu od 102,48 KM, YouTube u iznosu od 54,70 KM, Tempting BH u iznosu od 19,56 KM, Ramic trading u iznosu od 204,96 KM, Freser u iznosu od 97,79 KM, A.M.Transporte u iznosu od 39,12 KM i Pansion Cardak, Old town, Mostar u iznosu od 87,93 KM, odnosno ukupno 2.352,51 KM.

-Uvidom u dokumentaciju o poslovanju putem blagajne utvrđeno je da su u blagajnu stranke uplaćena sredstva za koja stranka ne posjeduje dokumentaciju iz koje se može utvrditi identitet donatora, i to: dana 30.09.2019. godine uplaćeno je 2.390,85 KM kao donacija grupe donatora iz Švajcarske, dana 08.10.2019.godine su uplaćena sredstva-donacije za regiju Bosna u iznosu od 800,00 KM, dana 15.10.2019. godine su uplaćena sredstva u iznosu od 421,00 KM po osnovu donacije i članarine od Emine iz Švajcarske, i dana 10.10.2019. godine izvršena je uplata sredstva u iznosu od 1.563,45 KM uz napomenu da su sredstva donacija lica Iskre iz Saint Luisa.

Takođe, uvidom u dnevnik blagajne broj: 95/19 od 22.10.2019. godine utvrđeno je da je izvršena uplata donacija iz Danske prema spisku u iznosu od 1.170,00 KM. Uvidom u spisak utvrđeno je da su podaci o prezimenu fizičkih lica naknadno dopisana, da na spisku nije predviđeno mjesto za potpis donatora, te da nije jasno naznačen datum prijema donacija.

⁴ U skladu sa članom 13, 14. i 15. Pravilnika o godišnjim finansijskim izvještajima političkih stranaka stranka je priloge fizičkih i pravnih lica imala obavezu iskazati u obrascima 3-a (prilozi fizičkih lica) i 3-b (prilozi pravnih lica) godišnjeg finansijskog izvještaja.

S obzirom da je primila priloge pravnih lica iz inostranstva i priloge neimenovanih, anonimnih donatora stranka je prekršila odredbe člana 8. stav (1) tačka i) i tačka e) Zakona o finansiranju političkih stranaka⁵.

d) Platforma za progres prekršila je odredbe člana 8. stav (4) Zakona o finansiranju političkih stranaka.

Platforma za progres primila je prilog u iznosu od 200,00 KM od pravnog lica koje je sklopilo ugovor o javnoj nabavci usluga sa organom izvršne vlasti na svim nivoima u Bosni i Hercegovini čija je vrijednost veća od 10.000,00 KM, čime je prekršila odredbe člana 8. stav (4) Zakona o finansiranju političkih stranaka.

Stranka je u toku 2019. godine primila prilog pravnog lica „Facit“ d.o.o. Sarajevo u iznosu od 200,00 KM.

Prema podacima koje je dostavilo Federalno ministarstvo unutrašnjih poslova, pravno lice „Facit“ d.o.o. Sarajevo je imalo sklopljen Ugovor o servisiranju i održavanju birotehničke opreme u toku 2019. godine sa Federalnim ministarstvom unutrašnjih poslova u ukupnoj vrijednosti od 11.699,29 KM.

e) Platforma za progres prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu obavljene revizije godišnjeg finansijskog izvještaja za 2019. godinu, utvrđeno je da Platforma za progres nije u skladu sa računovodstvenim propisima i odredbama Zakona o finansiranju političkih stranaka uspostavila i vodila potpune, pravovremene i pravilne evidencije o poslovanju gotovinom, приходima, rashodima i obavezama, niti je godišnji finansijski izvještaj popunila u skladu sa odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime su prekršene odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Takođe je utvrđeno da stranka nije izvršila popis imovine i obaveza na dan 31.12.2019. godine, što je suprotno računovodstvenim propisima. Umjesto izvještaja o popisu imovine i obaveza, stranka je na zahtjev revizora dostavila Inventurnu listu osnovnih sredstava iz poslovnih knjiga na dan 31.12.2019. godine.

(1) Platforma za progres nije u godišnjem finansijskom izvještaju iskazala cjelokupnu organizacionu strukturu, tj. nije iskazala niže organizacione odbore, čime je prekršila odredbe člana 10. Pravilnika.

Stranka je u obrascu 1-1 (organizaciona struktura političke stranke) navela da je imala samo Centralu stranke, dok je revizijom finansijskog izvještaja utvrđeno da je stranka u toku 2019. godine, pored Centrale stranke, imala 23 gradska i općinska odbora u okviru četiri regije.

U toku obavljanja revizije finansijskog izvještaja, stranka je dostavila svoju organizacionu strukturu u toku 2019. godine iz koje je utvrđeno da je imala sljedeće organizacione odbore: općinske odbore Stari Grad Sarajevo, Centar, Novo Sarajevo, Novi Grad Sarajevo, Ilidža, Hadžići, Vogošća, Visoko, Zavidovići, Ilijaš, Breza i Zenica u okviru Regije Bosna; Gradski odbor Mostar i općinske odbore Konjic, Jablanica i Stolac u okviru Regije Neretva; Gradski odbor Tuzla i općinske odbore Banovići, Živinice i Doboj u okviru Regije Sava; i općinske odbore Cazin, Sanski Most i Bihać u okviru Regije Una.

Takođe, uvidom u ugovore o zakupu poslovnih prostorija utvrđeno je da je stranka koristila prostorije u Bihaću i Tuzli, te prostorije u općini Novi Grad Sarajevo.

⁵ Članom 8. stav (1) tačka i) i tačka e) Zakona o finansiranju političkih stranaka zabranjeno je finansiranje političkih stranaka od strane pravnih lica iz inostranstva i neimenovanih, odnosno anonimnih donatora.

- (2) Na osnovu obavljene revizije godišnjeg finansijskog izvještaja utvrđeno je da stranka nije uspostavila pravilne i potpune evidencije o svojim prihodima, dio prihoda iz 2018. godine je evidentirala kao prihode 2019. godine, dok prihode naplaćene putem PayPal računa u decembru 2019. godine nije evidentirala u poslovnim knjigama za 2019. godinu. Isto tako je utvrđeno da je stranka pojedinačne uplate putem PayPal računa u periodu od januara do novembra iskazala u manjem iznosu za iznos provizije, čime je i ukupne prihode iskazala u manjem iznosu.

Pored navedenog, utvrđeno je da stranka u svojim poslovnim knjigama nije uspostavila pravilne evidencije o članarinama, priložima fizičkih lica i priložima pravnih lica, te je priloge fizičkih i pravnih lica evidentirala na istoj analitičkoj kartici, što za rezultat ima pogrešno iskazane podatke o članarinama i priložima u godišnjem finansijskom izvještaju.

-Uvidom u analitičke kartice članarine utvrđeno je da je stranka sredstva prikupljena putem PayPal računa u decembru 2018. godine u ukupnom iznosu od 1.819,67 KM evidentirala kao prihode 2019. godine.

-Stranka u poslovnim knjigama i godišnjem finansijskom izvještaju nije iskazala sredstva koji su uplaćena putem PayPal računa u decembru 2019. godine, čime je prekršila odredbe člana 13. i 14. Pravilnika.

Prema podacima sa PayPal računa, u toku decembra 2019. godine na ovaj račun su u različitim valutama uplaćena sredstva u ukupnom iznosu od 11.982,27 KM⁶, od čega su prilozi sljedećih pravnih lica: Pansion Cardak, Old Town, Mostar u iznosu od 46,94 KM (24,00 EUR), YouTube u iznosu od 20,54 KM (10,50 EUR) i Deal Depot u iznosu od 69,92 KM (40,00 USD).

-Stranka je sve uplate putem PayPal računa umanjivala za iznos provizije koja je naplaćena po svakoj pojedinačnoj uplati, čime su prilozi i članarine iskazane u manjem iznosu u odnosu na primljene, te su time i ukupni prihodi stranke iskazani u manjem iznosu za 2.311,90 KM⁷ u odnosu na ostvarene.

-Kontrolom poslovnih evidencija o prihodima stranke, utvrđeno je da je stranka uplate primljene putem PayPal računa u periodu od januara do avgusta 2019. godine u ukupnom iznosu od 30.433,98 KM evidentirala na kontu članarina u sljedećim iznosima: januar u iznosu od 2.423,18 KM, februar u iznosu od 4.247,14 KM, mart u iznosu od 2.167,35 KM, april u iznosu od 3.735,11 KM, maj u iznosu od 11.482,31 KM, juni u iznosu od 3.145,74 KM, juli u iznosu od 2.216,91 KM i avgust u iznosu od 1.016,24 KM.

Stranka prilikom knjiženja nije vršila razdvajanje prihoda od članarine od priloga fizičkih i pravnih lica, te nije uspostavila evidencije o pojedinačnim uplatama za svakog donatora pojedinačno.

Ističemo da je stranka u navedenom periodu, putem PayPal računa, primila priloge pravnih lica u ukupnom iznosu od 1.725,85 KM, a da je iste u poslovnim knjigama i godišnjem finansijskom izvještaju iskazala kao prihode od članarine, čime je prekršila odredbe člana 13. i 15. Pravilnika.

- (3) Platforma za progres je u obrascu 3-a (prilozi fizičkih lica) godišnjeg finansijskog izvještaja iskazala priloge fizičkih lica veće od 100,00 KM u ukupnom iznosu od 114.853,09 KM i priloge fizičkih lica manje od 100,00 KM u ukupnom iznosu od 49.120,98 KM, odnosno ukupno 163.974,07 KM.

Ističemo da je stranka izvršila ispravku unesenih podataka u obrazac 3-a (prilozi fizičkih lica) godišnjeg finansijskog izvještaja za 2019. godinu, te je korigovani obrazac dostavila Centralnoj izbornoj komisiji Bosne i Hercegovine dana 13.10.2020. godine.

⁶ U odnosu na Preliminarni izvještaj o reviziji godišnjeg finansijskog izvještaja za 2019. godinu izvršena je ispravka iznosa sredstava primljenih u valuti EUR. Stranka je primila sredstva u sljedećim iznosima: 3.730,06 USD; 2.161,32 EUR; 550,00 SEK; 468,00 CHF; 160,00 AUD i 360,00 DKK.

⁷ U periodu od januara do novembra naplaćena je provizija po pojedinačnim uplatama, kako slijedi: 878,82 USD; 223,72 EUR; 28,75 SEK; 25,08 NOK; 96,37 CHF; 60,92 CAD; 45,91 AUD i 14,00 DKK.

Kontrolom iskazanih podataka u korigovanom obrascu 3-a, izvoda i podataka sa transakcijskih i deviznih računa, PayPal računa i blagajne stranke, utvrđeno je sljedeće:

1. Stranka je u obrascu 3-a iskazala prilog fizičkog lica Emina Zlotrg u iznosu od 1.000,00 KM. Kontrolom uplata na transakcijskom računu utvrđeno je da je fizičko lice Emina Zlotrg uplatilo prilog u iznosu od 1.000,00 KM dana 03.06.2019. godine, ali da je dana 17.10.2019. godine izvršen povrat sredstva ovom fizičkom licu. Stranka nije imala obavezu da u godišnjem finansijskom izvještaju iskaže ovaj prilog jer je isti vratila donatoru.
2. Kontrolom uplata na deviznom računu u valuti CAD utvrđeno je da je stranka primila prilog fizičkog lica Fikret Artuković u iznosu od 134,03 KM. Pored navedenog priloga, stranka je putem PayPal računa od istog lica primila i sredstva u iznosu od 64,72 KM. Stranka je priloge ovog lica u ukupnom iznosu od 198,75 KM trebala iskazati u obrascu 3-a (prilozi fizičkih lica) u dijelu u koji se upisuju podaci o donatorima čiji su prilozi veći od 100,00 KM.

Takođe, utvrđeno je da stranka nije iskazala priloge veće od 100,00 KM za veliki broj fizičkih lica, među kojima su: Eugenio Zanardo u iznosu od 1.130,03 KM, Mirzeta Hadžikadić u iznosu od 4.594,52 KM, Adna Musić u iznosu od 1.841,22 KM, Amer Čatović u iznosu od 3.416,00 KM, Aner Trtak u iznosu od 1.294,31 KM, Avdo Čatić u iznosu od 1.076,04 KM, Kemal Garić u iznosu od 5.000,00 KM, Lana Bećiragić u iznosu od 2.330,00 KM i Mehdin Mehić u iznosu od 2.049,60 KM.

3. U obrascu 3-a stranka je iskazala priloge Sakibe Hotović veće od 100,00 KM u ukupnom iznosu od 10.087,67 KM. Kontrolom uplata na deviznom računu u valuti EUR, izvoda sa transakcijskog računa i blagajne stranke, utvrđeno je da je stranka od ovog fizičkog lica primila sredstva u ukupnom iznosu od 12.330,47 KM.
4. Stranka je u obrascu 3-a iskazala priloge Sejde Čavčić veće od 100,00 KM u ukupnom iznosu od 328,47 KM. Pregledom uplata putem PayPal računa utvrđeno je da je fizičko lice Sejda Čavčić putem PayPal računa uplatila priloge u ukupnom iznosu od 2.514,67 KM (1.286,02 USD, 1.150,05 EUR i 300,00 DKK).

Isto tako, stranka je u obrascu 3-a iskazala donacije Semira Delića u iznosu od 319,98 KM, a ovo fizičko lice je putem PayPal računa uplatilo sredstva u ukupnom iznosu od 3.481,40 KM⁸.

5. Stranka je u obrascu 3-a iskazala donacije Merime Livadić veće od 100,00 KM u ukupnom iznosu od 521,17 KM. Kontrolom uplata na deviznom računu u valuti CHF i prema podacima iz blagajne stranke, utvrđeno je da je stranka primila priloge fizičkog lica Merime Livadić u ukupnom iznosu od 657,06 KM.
6. Stranka je u obrascu 3-a iskazala priloge fizičkih lica Džane Berkovac u iznosu od 7.760,00 KM, Sanite Mujkanović u iznosu od 7.114,29 KM i Elme Likić u iznosu od 2.588,00 KM. Kontrolom izvoda sa transakcijskog računa utvrđeno je da su navedena lica dala stranci priloge u većem iznosu od prijavljenih u obrascu 3-a. Naime, Džana Berkovac je donirala sredstva u iznosu od 12.760,00 KM, Sanita Mujkanović u iznosu od 8.064,29 KM i Elma Likić u iznosu od 4.588,00 KM. Stranka za navedena lica nije pravilno izdala ni potvrde o prijemu priloga, čime je prekršila odredbe člana 6. Pravilnika.

Na isti način su iskazani i prilozi kod znatnog broja donatora-fizičkih lica koje je stranka iskazala u obrascu 3-a. Između ostalih, prilozi sljedećih donatora su iskazani u manjem iznosu u odnosu na primljene: Semira Muhtari-Puškar, Alija Bevki, Fatima Kalača, Midhat Durčak, Mirsad Hadžikadić i Mirza Elezović.

7. Uvidom u izvod sa deviznog računa u valuti EUR, broj 20 od 08.04.2019. godine, utvrđeno je da je izvršena uplata sa računa Anela i Mirele Kikanović-Bešić u ukupnom iznosu od 234,70 KM (120,00 EUR) uz napomenu da je uplata za članarinu i donaciju za člana broj 4347. S

⁸ Uplata u iznosu od 2.050,00 USD, odnosno 3.501,40 KM umanjeno za 20,00 KM članarine.

obzirom da je prema evidenciji stranke, član Platforme za progres Mirela Kikanović-Bešić, stranka je imala obavezu da u obrascu 3-a donaciju fizičkog lica Mirela Kikanović-Bešić iskaže u iznosu od 214,70 KM, a članarinu u iznosu od 20,00 KM. Stranka je, međutim, u poslovnim knjigama evidentirala prilog Anela i Mirele Kikanović-Bešić u iznosu od 194,70 KM, te članarine u iznosu od 40,00 KM.

8. U obrascu 3-a iskazan je prilog fizičkog lica Behzad Kozarac u iznosu od 186,29 KM. Uvidom u izvode sa deviznog računa u valuti EUR, utvrđeno je da je ovo fizičko lice stranci uplatilo priloge u ukupnom iznosu od 713,46 KM, te članarinu u iznosu od 20,00 KM. Pored navedenog, ističemo da uvidom u analitičke kartice prihoda, konto 410000-*Prihodi od članarine* i konto 412000-*Prihodi od donacija*, nije utvrđeno da je stranka u poslovnim knjigama evidentirala prilog ovog fizičkog lica uplaćen dana 18.02.2019. godine u iznosu od 48,90 KM (25,00 EUR).
9. Uvidom u izvode sa deviznog računa u EUR, utvrđeno je da je Mediha Mutabdžić uplatila sredstva u iznosu od 156,47 KM (80,00 EUR) na ime Šemsudina Mutabdžića i Medihe Mutabdžić. Uvidom u poslovne knjige utvrđeno je da je stranka sredstva u iznosu od 156,47 KM evidentirala kao prihode od članarine. Imajući u vidu odredbe Odluke o visini članarine, utvrđeno je da je stranka prihode od članarine iskazala u većem iznosu u odnosu na visinu članarine koja je propisana Odlukom, tj. stranka je od navedenih lica pored članarine primila i priloge.
10. U obrascu 3-a stranka je iskazala donaciju fizičkog lica Merhunise Veselji u ukupnom iznosu od 122,85 KM. Uvidom u poslovne knjige utvrđeno je da je stranka u poslovnim knjigama evidentirala prilog fizičkog lica Merhunise Veselji u iznosu od 142,85 KM, te članarinu istog lica u iznosu od 20,00 KM.

Uvidom u izvode sa deviznog računa u valuti CHF utvrđeno je da je na račun stranke dana 17.12.2019. godine izvršena uplata od strane Zejne Veselji u iznosu od 142,85 KM (80,00 CHF), a da je u opisu transakcije navedeno Merhunisa Veselji, Muhamed Veselji, Vildana Veselji i Nezira Hodž. Uvidom u evidencije o članovima stranke utvrđeno je da su navedena lica članovi stranke.

Na osnovu navedenog, konstatujemo da stranka prilikom popunjavanja podataka o donatorima i iznosima pojedinačnih priloga u obrascima godišnjeg finansijskog izvještaja nije postupala u skladu sa odredbama člana 14. Pravilnika, tj. podatke o priložima fizičkih lica, kao što su: ime i prezime i iznos priloga, nije pravilno iskazala u obrascu 3-a.

Ističemo da politička stranka u obrascu 3-a (prilozi fizičkih lica) ima obavezu da iskaže podatke o svakom donatoru pojedinačno, ukoliko je ukupan iznos svih novčanih priloga istog lica veći od 100,00 KM. Stranka je obavezna da navede podatke iz kojih se jasno može utvrditi identitet donatora, ime i prezime, broj potvrde o primljenom prilogu, datum kada je prilog primljen i iznos priloga. Ukoliko isti donator u toku jedne kalendarske godine političkoj stranci da više puta priloge u iznosima manjim od 100,00 KM, stranka je obavezna sabrati sve te priloge, i ukoliko je njihov ukupan iznos veći od 100,00 KM u obrascu navesti podatke o donatoru i ukupan iznos priloga. Prilozi čiji je iznos u toku jedne kalendarske godine manji od 100,00 KM u izvještaju se iskazuju zbirno, u dijelu obrasca 3-a Prilozi niži od 100,00 KM.

- (4) Obrazac 3-b (prilozi pravnih lica) godišnjeg finansijskog izvještaja nije popunjen u skladu sa odredbama člana 15. Pravilnika.

-Stranka je u obrascu 3-b iskazala prilog pravnog lica Tola company d.o.o. u iznosu od 2.000,00 KM. Kontrolom uplata na transakcijskom računu utvrđeno je da je ovo pravno lice uplatilo prilog u iznosu od 2.000,00 KM dana 04.01.2019. godine, ali da je dana 17.10.2019. godine izvršen povrat sredstva ovom pravnom licu. Stranka nije imala obavezu da u godišnjem finansijskom izvještaju iskaže ovaj prilog jer isti nije ni ostvarila.

-Platforma za progres je u obrascu 3-b iskazala prilog Hora žena Odense u iznosu od 157,16 KM i prilog Kakanj Trade Kakanj u iznosu od 150,00 KM.

U postupku revizije utvrđeno je da je stranka priloge pet fizičkih lica-članica Hora žena Odensa iskazala kao prilog pravnog lica. Takođe je utvrđeno da je stranka prikupljena sredstva-donacije pet fizičkih lica u iznosima od po 30,00 KM, odnosno ukupno 150,00 KM umjesto u obrascu 3-a iskazala u obrascu 3-b kao prilog Kakanj Trade Kakanj, čime je prekršila odredbe člana 13, 14. i 15. Pravilnika.

-Stranka nije u obrascu 3-b iskazala priloge pravnih lica, koje je primila putem PayPal računa, u ukupnom iznosu od 2.352,50 KM.

-Uvidom u kopiju izdatih potvrda pravnim licima, koje je dostavila stranka, utvrđeno je da podaci o brojevima potvrda koje je stranka iskazala u obrascu 3-b (prilozi pravnih lica) nisu pravilno iskazani, tj. brojevi potvrda koje je stranke upisala u obrazac ne odgovaraju brojevima koji su navedeni u potvrdama.

-Stranka je u obrascu 3-b iskazala da je pravno lice NIGH d.o.o. dalo prilog stranci, iako je iz izvoda sa transakcijskog računa i poslovnih knjiga evidentno da je donator NGH d.o.o.

(5) Politička stranka nije uspostavila potpune i pravovremene evidencije o rashodima i nije pravilno iskazala rashode u obrascima 4. (ukupni rashodi političke stranke) i 4.1 (režijsko-administrativni i ostali troškovi) godišnjeg finansijskog izvještaja, čime je prekršila odredbe člana 7. stav (2), 21. i 22. Pravilnika.

- Stranka u poslovnim knjigama nije uspostavila evidencije o troškovima po svojim organizacionim dijelovima niti je u godišnjem finansijskom izvještaju iskazala podatke o troškovima u obrascima 4.1 za svaki organizacioni dio posebno, a što je bila obavezna u skladu sa odredbama člana 7. stav (2) Pravilnika.

- Kontrolom troškova zakupa poslovnih prostora koje je stranka iskazala u godišnjem finansijskom izvještaju, utvrđeno je da stranka nije u obrascima rashoda pravilno iskazala troškove zakupa poslovnih prostora, odnosno troškove zakupa sala.

Naime, stranka je u obrascu 4.1 za Centralu iskazala troškove zakupa poslovnih prostora u ukupnom iznosu od 18.030,00 KM. Uvidom u ugovore o zakupu poslovnih prostora koje su koristili Centrala i organizacioni odbori stranke u Tuzli, Bihaću i Novom Gradu Sarajevo, utvrđeno je da su troškovi zakupa poslovnog prostora koji je koristila Centrala stranke iznosili 12.000,00 KM, a da su troškovi zakupa poslovnog prostora koji je stranka koristila u Bihaću iznosili 2.100,00 KM, Tuzli u iznosu od 2.400,00 KM i Novom Gradu Sarajevo u iznosu od 1.500,00 KM.

Takođe je utvrđeno da je stranka u okviru troškova zakupa poslovnog prostora Centrale pogrešno iskazala i troškove zakupa sale u iznosu od 30,00 KM.

- Stranka u poslovnim knjigama nije evidentirala i u godišnjem finansijskom izvještaju nije iskazala troškove provizije po transakcijama putem PayPal računa, a koje je u periodu od januara do decembra 2019. godine iznosila 2.858,49 KM⁹.

- Kontrolom računa za hotelske usluge koje su evidentirani u poslovnim knjigama, utvrđeno je da je stranka troškove zakupa sala u iznosu od 360,00 KM i troškove restoranskih usluga u iznosu od 140,00 KM po računu Hotela Mepas umjesto na kontima troškova zakupa, odnosno troškova ugostiteljskih usluga evidentirala na kontu 405000-Troškovi hotela. Isto tako, stranka je troškove zakupa sale u iznosu od 150,01 KM, a po računu Hotela Bosna broj: 2019-m100-53-003 od 23.11.2019. godine u ukupnom iznosu od 162,01 KM, iskazala kao troškove reprezentacije-ugostiteljske usluge.

⁹ 1.054,27 USD; 338,21 EUR; 62,70 SEK; 25,08 NOK; 130,44 CHF; 60,92 CAD; 54,85 AUD i 35,04 DKK.

- Revizijom su utvrđeni nedostaci kod računa dobavljača, koji su knjigovodstvene isprave o nastalim poslovnim događajima¹⁰.

Kontrolom računa za ugostiteljske usluge koje su proknjiženi u poslovnim knjigama, utvrđeno je da račun Restorana „Casa United“ broj: 01-19 od 12.03.2019. godine u iznosu od 400,00 KM ne sadrži podatke o vrsti i količini hrane i pića, već je na istom navedeno samo konzumacija hrane i pića.

- Uvidom u račune za robe i usluge utvrđeno je da računi prije knjiženja u poslovnim knjigama nisu prošli kontrolu, tj. nisu potpisom odgovornog lica ili lica koje je zaduženo za kontrolu računa odobreni za knjiženje.

(6) Kontrolom blagajničkih izvještaja i dokumentacije o poslovanju putem blagajne utvrđeni su formalni i suštinski nedostaci kod dokumentacije o poslovanju gotovinom.

Uvidom u blagajničke naloge isplate utvrđeno je da nisu potpisani od strane lica koja su isplatila i primila novčana sredstva, tj. blagajnika i lica koje je primilo sredstva. Isto tako, ni nalozi naplate ne sadrže potpis blagajnika niti lica koje je uplatilo sredstva u blagajnu. Nalozi isplate, odnosno nalozi naplate koji su u postupku revizije kontrolisani, potpisani su samo od strane lica koje je knjižilo.

Kada je riječ o dnevnicima blagajne, koji sadrže podatke o prometu gotovine u toku dana, utvrđeno je da nisu potpisani od strane blagajnika, niti su kontrolisani prije knjiženja, već je navedeno samo ime i prezime lica-blagajnika. Pored navedenog, utvrđeno je da dnevnicima blagajne nisu na pravilan način označeni, tj. na dnevniku od 31.12.2019. godine naveden je broj 112/19, dok je blagajnički dnevnik od 27.11.2019. godine označen sa brojem 113/19, a dnevnik od 13.12.2019. godine označen sa brojem 120/19.

Stranka ne posjeduje ni dokumentaciju za sva uplaćena sredstva u blagajnu po osnovu priloga i članarina, a uz pojedine naloge naplate nisu priloženi ni spiskovi o donatorima i iznosima pojedinačnih donacija. Kontrolom pojedinačnih spiskova koji su se nalazili u prilogu naloga naplate, utvrđeno je da na istim nije predviđena rubrika za potpis lica koja su uplatila sredstva, niti su fizičkim licima izdate pojedinačne uplatnice na kojima bi se fizička lica mogla potpisati.

Pored navedenog, utvrđeno je da su prilogi u gotovom novcu primani i u stranim valutama, te da je stranka sredstva prikupljena na takav način evidentirala u blagajni stranke u konvertibilnim markama, te položila na transakcijski račun.

(7) Revizijom godišnjeg finansijskog izvještaja utvrđeno je da Platforma za progres nije vršila usaglašavanje svojih obaveza, te da nije u godišnjem finansijskom izvještaju iskazala sve svoje obaveze na dan 31.12.2019. godine, čime je prekršila odredbe člana 24. Pravilnika.

1. Uvidom u poslovne knjige utvrđeno je da su ukupne obaveze stranke na dan 31.12.2019. godine iznosile 24.190,01 KM, od čega: obaveze prema dobavljačima 4.138,50 KM, obaveze za autorski i ugovore o djelu 1.130,00 KM, obaveze za bruto plate 3.489,12 KM i ostali kratkoročni zajmovi 15.432,39 KM.

Stranka je u obrascu 5 (obaveze) iskazala samo obaveze po osnovu pozajmica u ukupnom iznosu od 15.432,39 KM.

2. U postupku revizije, od stranke je zatraženo da obezbijedi konfirmacije o obavezama sa dobavljačima Face d.o.o., Hotel Džananović Transport i Strandard Furniture Factory, ali stranka nije obezbijedila konfirmaciju za pravno lice Face d.o.o..

¹⁰ U skladu sa računovodstvenim propisima, sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

Uvidom u poslovne knjige utvrđeno je da stranka na kontu 180000-*Unaprijed plaćeni troškovi* imala evidentirano potraživanje od dobavljača Hotel Džananović Transport u iznosu od 500,00 KM. Prema podacima koje je dostavilo pravno lice Džananović Transport d.o.o. Zenica, Platforma za progres nema obaveze prema ovom pravnom licu. Takođe, pravno lice nije navelo da ima obaveze prema stranci u iznosu od 500,00 KM.

Isto tako, stranka u poslovnim knjigama ima evidentirano potraživanje od dobavljača Strandard Furniture Factory u iznosu od 300,00 KM. Uvidom u podatke koje je dostavio dobavljač utvrđeno je da stranka na dan 31.12.2019. godine nema obaveze prema ovom dobavljaču.

Činjenica da stranka u svojim poslovnim knjigama na kontu 180000-*Unaprijed plaćeni troškovi* iskazuje potraživanja po osnovu datih avansa dobavljačima u ukupnom iznosu od 17.311,84 KM¹¹, ukazuje da stranka ne iskazuje sve svoje troškove, te da nema tačne evidencije o svojim troškovima i obavezama.

5.2. PREPORUKE

Preporučuje se Platformi za progres da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da sačini i dostavi program utroška sredstava i da finansijska sredstva obezbijedena za finansiranje stranke koristi u skladu sa programom utroška sredstava,*
- *da prijavljuje sve priloge i da izdaje potvrde o prijemu priloga,*
- *da se ne finansira iz zabranjenih izvora,*
- *da vodi poslovne knjige u skladu sa računovodstvenim propisima, odnosno da vodi potpune, pravovremene i pravilne evidencije o novčanim tokovima, prihodima, rashodima i obavezama, kao pretpostavku za pravilno finansijsko izvještavanje i*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

Takođe se preporučuje:

- *da uspostavi upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma,*
- *da izvrši usaglašavanje obaveza sa dobavljačima i provede odgovarajuća knjiženja u poslovnim knjigama,*
- *da vrši redovan popis imovine i obaveza u skladu sa računovodstvenim propisima,*
- *da sadržaj potvrde o primljenoj članarini i priložima od fizičkih i pravnih lica uskladi sa odredbama člana 6. Pravilnika o godišnjim finansijskim izvještajima političkih stranaka,*
- *da definiše postupke i procedure internih kontrola u vezi sa procesom trošenja finansijskih sredstava stranke i*
- *da poštuje i druge propise, prevashodno finansijske propise o poslovanju gotovim novcem.*

¹¹ Stranka je na dan 31.12.2019. godine izvršila prenos dugovnog salda sa konta obaveza prema dobavljačima na potraživanja.

KOMENTAR:

U ostavljenom roku, Platforma za progres nije se očitovala na Preliminarni izvještaj o reviziji godišnjeg finansijskog izvještaja za 2019. godinu.

Zahvaljujemo se licu ovlaštenom za podnošenje finansijskih izvještaja i zaposlenim u Platformi za progres na dobroj i korektnoj saradnji.

Šef Odsjeka za revizijske poslove, revizor

Sanja Tošović

Pomoćnik revizora

Anela Burdžović Kapić

Šef Službe za reviziju

Mr.sc Hasida Gušić